

18/98 SUMARIOA



EGIN'-EN ITXIERA. Espainiako Poliziak Egin egunkaria eta Egin Irratia itxi zituen 1998ko uztailaren 18an.



ADRIAN DIAZ DE TUESTA
AEK-REN ALDE. Garzonek AEKren aurkako neurriak hartu zituelarik, ugariak izan ziren herri mobilizazioak.



JOXE LACALLE
'ARDI BELTZA' ITXITA. Pepe Rei zuzendaria auzipetu eta Ardi Beltza aldizkaria itxi zuen Garzonek.

Erredakzioa | DONOSTIA

Ia bost urte iraun du 18/98 sumarioaren instrukzioak, baina «ETA-KAS-Ekin auzia» amaitu du Baltasar Garzon epaileak. Egin-en itxiera izan zen lehen ondorioa. Sumarioan, Orain, Xaki, Ekin—ABK eta Joxemi Zumalabe barne—, Pepe Rei, AEK eta Zabaltzen atalak bildu ditu Garzonek. Auzipetu guztiak aske daude, ahozko epaiketa noiz hasiko zain.

ORAIN ATALA

1998-05-27. Espainiako Poliziak hamabi lagun atxilotu zituen, Baltasar Garzon epailearen aginduz, «ETA-KAS erakunde terroristarekin» lotura izatea egotzita. Enpresa txiki batzuk miatu eta blokeatu egin zituzten.

1998-07-15. Egin egunkaria eta Egin Irratia itxi zituen Garzon epaileak, eta polizi operazioan 15 pertsona atxilotu.

1998-11-20. Egin auziari buruzko autoa kaleratu zuen Garzonek, eta 26 pertsona auzipetu. Hamaseiri, talde armatuko kide izatea egotzi zien. Halaber, KAS legez kanpoko deklaratu zuen.

2001-06-21. Egin auziko 22 lagun auzipetzea berretsi zuen Auzitegi Nazionalako Zigor Alorreko Laugarren Gelak, eta lau auzipeturi inputazioa kendu zien. Talde armatuko kide izateko akusazioa auzipetu baka-rriari mantendu zion. Orain S.A. enpresako kontseilari guztiei inputazio hori kenduta, Egin ix-teko Garzonek erabili zuen argudioa baliogabetu zuen.

2001-07-12. Joxean Etxeberria eta Pablo Gorostiaga EAEko legebiltzarkide ohiak auzipetu zituen Garzonek Egin auzian.

PEPE REI ATALA

1999-03-08. Pepe Rei, Egin-eko ikerketa taldeko burua, atxilotu eta espetxeratu zuten, ETArri laguntza ematea egotzita. Hilabetera aske utzi zuten.

2001-01-18. Pepe Rei, Ardi Beltza aldizkari zuzendaria, atxilotu

Epaile instruktorea eta 'gomazko sumarioa'

KRONOLOGIA. 1998tik, auzia zabaldu zuenetik, hainbat erakunde nahasi ditu Baltasar Garzon epaileak 18/98 sumarioan



EGUNKARIA
ESKUBIDEEN ALDE. Desobedientziaren bidetik Euskal Herriaren eskubide demokratikoen alde leloarekin Donostian eginiko manifestazioa, 18/98 auziaren inguruko ekimenak salatzeko.

eta espetxeratu zuten, lehengo delituak berriz egitea egotzita.

2001-03-29. Rei ETako kide gisa auzipetu zuen Garzonek. Ardi Beltza-ko zuzendariaren aurkako inputazioa aldatuta, aldizkaria ixteko bidea egin zuen epaile instruktoreak.

2001-06-13. Pepe Rei aske uztea erabaki zuen Auzitegi Nazionalako Zigor Alorreko Laugarren Gelak, Garzonen akusazioak baliogabetuta. Kazetari jardunean «terrorismo deliturik» ez zuela egin ebatzi zuen.

2002-02-06. Aurreko irizpidea erabat aldatu, eta Rei ETako kide gisa auzipetu zuen Auzitegi Nazionalako Laugarren Gelak.

EKIN ATALA

2000-09-13. Hogeia lagun atxilotu zituzten Ekinen aurkako operazioan, eta EHren egoitzak miatu. Ekin 1999ko urrian sortu zen.

2000-09-16. Ekinen aurkako operazioan atxilotutako 18 espetxeratu zituen Garzonek.

2000-10-05. Bederatzi lagun atxilotu zituen Poliziak, zortzi Joxemi Zumalabe Fundazioko kideak eta beste bat ABK-koa, «desobedientzia zibila bultzatzeaz» akusatuta. Azaroaren 1ean Mikel Zuluaga Auzitegian aurkeztu eta espetxeratu egin zuten.

2001-04-04. Auzitegi Nazionalako Laugarren Gelak Ekinen aurkako operazioan atxilotutako zazpi pertsona aske utzi zituen—beste batzuk lehendik ziren aske—; egun berean, Garzonek legez kanpoko jo zuen Ekin.

2001-07-31. Ekin eta Zumalabe kasuetan 31 lagun auzipetu zituen Garzonek: Ekineko 21 eta Joxemi Zumalabe Fundazioko eta ABK-ko hamar. Alberto Friasi eta Mario Zubiaga ere inputatu gisa deklaratzera deitu zituen, eta gero auzipetu.

2001-12-21. Ekin auziko azken sei kartzelaratuak askatzeko agindu zuen Auzitegi Nazionalak, «ETA-Ekin lotura frogatzeko daturik ez dagoelako».

2002-03-07. Garzonek Ekin legez kanpo uzterik ez zuela ebatzi zuen Auzitegi Nazionalako Laugarren Gelak, eta haren erabakia atzera bota zuen.

XAKI ATALA

1999-03-09. Poliziak Nekane Txapartegi atxilotu zuen. Eta hurrengo egunetan Mikel Egibar, Maite Ubiria eta Carlo Maria Gonzatto.

2000-01-29. HBko nazioarteko taldeko zortzi kide atxilotu zituzten. Batzuk, martxoan beren borondatez Auzitegi Nazionalera deklaratzera joanak ziren. Garzonek ezker abertzalearen nazioarteko lana ETaren menpe dagoela argudiatu zuen, eta Xakiren helburuetako bat «Es-

painiako ordenamendu juridikoa deslejitimizatzea» dela.

2000-03-02. Joxe Mari Olarra HBko Mahai Nazionalako kidea atxilotu zuen Guardia Zibilak. Hurrengo egunean aske zen.

2000-08-07. HBko eta AABetako nazioarteko taldeko 16 kide auzipetu zituen Garzonek.

2001-02-08. Xaki auziko azken hiru espetxeratuak askatu eta hamasei auzipetuetatik bosten inputazioa atzera bota zuen Auzitegi Nazionalak. Erakundea legezkoa dela adierazi zuen.

2001-03-13. Xaki elkartea itxi egin zuen Garzonek.

AEK ATALA

2000-11-22. AEKren ondasun guztiak bahitu eta 19 lagun deklaratzera deitu zituen Garzon epaileak. AEK «ustez ETA-KAS sarearen antolaketa egiturako partetzat» jo zuen.

2000-11-30. Aurreneko lau inputatuek Auzitegi Nazionalan deklaratu zuten, eta Garzonek ez zuen neurririk hartu haien aurka, ez beste guztien aurka.

2001-06-05. AEKren diru-kontrol guztia administratzaile judizialaren esku jarri zuen Garzonek.

2001-10-31. Administratzaile judizialak AEKren diru-kontuetan irregulartasunik ez dagoela esan zuen.

2001-12-19. AEK-k Gizarte Segurantzarekin lituzkeen zorrak epeka kitatzea onartu zuen Espainiako Gobernuak.

2001-12-26. AEKri kontrol judiziala kendu, eta auzia Bilboko auzitegira igorri zuen Garzonek.

ZABALTZEN ATALA

2001-01-23. Espainiako Polizia Zabaltzen enpresa banatzailearen egoitzan sartu zen, Garzon epailearen aginduz.

2001-11-03. Zabaltzenen jarduerari legezko iritzi, eta auzia atxibatu egin zuen Garzonek.